

暖蜀世的老酒

馬祖冬天風野透，天氣野清。

老農講：食老酒對身體野好。因此，冬天蜀邁，每蜀工食暝時間，個郎村咧空氣都飄著老酒味。

農家厝裡野蜀樣，冬天食暝辰候，依嬾一定會搭依爹暖蜀杯老酒。酒暖好，鼎蓋蜀翻起呵，煙馬上竄起，滿厝都是老酒氣味，野昫野昫都癯散。厝裡暖暖的，身體暖暖的，心野暖暖的。

酒蜀暖好，依爹等癯及，馬上就叫依嬾掏乞伊啜，啜蜀喙儷，一定會講：「野好。」看伊蜀面滿足的樣式，野像無什哪毛比老酒更更好食的。

依爹愛食酒，尤其是自家做的馬祖老酒；我厝的兄弟姊妹都像依爹，盡會食酒，啲啦剩我，野驚鼻著酒味，更更使講食有老酒味的毛。

冬天做風勃暴辣，依爹驚農家寒呵，心想紅蟳加秫米燉老酒食啊野補，稠稠會吼依嬾燉乞農家蜀厝農齊享受，野稠稠帶魚加老酒燉，固有煮老酒線麵；無想邁佻捌世的我，因為無耐接受食的毛當中有老酒味，因此佻食，無管依嬾總款勸，脾氣野臭硬的我就是佻食，依爹氣得想掏扁擔拍我，都是依嬾對手勸依爹，改來耐心勸我：「食佻罔覷蜀覷嘛，盡好食呵」。

依嬾跔呵以後，依爹習慣固是在冬天食暝辰候暖蜀杯老酒，但是伊野少講話，啲自家靜靜略啜，癯像固底曲馬祖辰候，大聲講話，啜蜀喙酒，配蜀喙魚乾固是鴨肉，喙啲啲儷，滿意的講：「好酒，食儷蜀身野透皎。」

依嬾跔呵以後，依爹野無心緒做老酒，農家就去買馬祖老酒起乞伊食，但是，伊啜儷佻是講這紅麴癯好、就是講顏色癯對、固有什哪水不甜、味癯香。但是我會捌，真正的原因是伊嬾不故伊身兜，酒就癯甜癯暖呵了。

蜀邁冬天清清暝晡，大家都講老酒好，自家做娘嬾以後，野煮蜀碗蛋酒、老酒線麵，兩個姿農罔食呵蜀面紅丹丹。骹手暖呼呼、蜀冬天都佻驚清，者辰候佻會捌馬祖老酒正正是好毛，野佻體會邁「天下爸嬾心」。

為了留下娘嬾的愛，為了討轉蜀冬天故鄉空氣中飄散著暖暖的酒意，靜靜略聞，捏著鼻慢慢的啜，酒味癯苦澀呵，有的啲剩娘嬾滿滿的、暖暖的愛，回甘在喙咧，直透罔著心咧。